

**Geistlicher Baustein Nr. 6**

Der Spätregen

Ernteregen, Entrückungsglaube

Albanische Übersetzung :

**Guri Frymor i Ndertimit Nr. 6**

**- SHIU I VONSHËM SHIU I KORRJES, BESIMI NË RRËMBIM –**

Joeli 2:23-27:

„Dhe ju, bijtë e Sionit, gëzohuni dhe ngazëllohuni për Zotin, Perëndinë tuaj, sepse Ai ju jep shiun e hershëm në masën e duhur, dhe Ai do t'ju bëjë të bjerë shi i bollshëm që në ditën e parë — shi i hershëm dhe i vonshëm.“

Tani, thuhet se Perendia do të „rikthejë“. Epoka e Luterit nuk e riktheu kishën. Ajo vetëm filloi një reformë. Epoka e Ueslit (Wesley) nuk e riktheu. As epoka e Pentekostit nuk e riktheu. Por Perendia duhet ta rikthejë, sepse Ai nuk mund ta mohojë Fjalën e Tij. Kjo nuk është ringjallja e kishës, kjo është rikthimi i saj. Perendia do ta sjellë kishën drejtpërdrejt përsëri tek Pentekosti i fillimit.

Kini parasysh tani, në Joeli 2:25 thuhet pse kemi nevojë për rikthim: karkaleci, ngrënësi, shkatërruesi dhe brejtësi kanë ngrënë gjithçka përveç rrënjës dhe një copëze të vogël të kërcellit. Tani, ne e dimë se të gjitha këto insekte janë në të vërtetë e njëjta insekt në faza të ndryshme. Kjo është e saktë. Ato përfaqësojnë frymën antikrisht, e shfaqur në organizim, denominim dhe mësim të rreme gjatë epokave. Dhe kjo rrënjë e vogël e varfër dhe kërcelli do të rikthehen. Perendia nuk do të mbjellë një kishë të re, por do ta sjellë mbjelljen e Tij origjinale përsëri tek fara origjinale. Ai do ta bëjë këtë ashtu siç përshkruhet në vargun 23, përmes mësimit ose „shiut të hershëm“. Më pas do të vijë shiu i korrrjes ose besimi për rrëmbim.

Profeti tha se do të ketë një shi të hershëm dhe një shi të vonshëm. Në shiun e vonshëm, shiu i hershëm dhe ai i vonshëm do të bien bashkë — një kishë e madhe, universale, dhe ajo do të lëvizë nga njëra anë e botës në tjetrën. Një mesazh i madh, shenja dhe mrekulli të mëdha do të kryhen përmes kësaj kishe. Danieli tha se populli që e nje Perëndinë e vet në atë ditë do të jetë i fortë, dhe njohuria do të rritet. Kjo është pikërisht aty ku po jetojmë në këtë ditë (Danieli 12:4, 9-10).

Dhe do të ketë një shi të vonshëm, dhe ai do të shfaqet dhe do të jetë si shiu i hershëm. Shiu i hershëm dhe ai i vonshmi do të jenë së bashku. Ne e dimë se kemi pasur shumë mashtrime dhe kulte që kanë dalë prej kësaj, por megjithatë fjala e Perëndisë mbetet e vërtetë.

Tani mbajeni mend këtë: Bibla premton që në këto ditët e fundit, pikërisht në fund të kohës, do të shfaqet një dritë tjetër e krishterë — shiu i hershëm dhe ai i vonshmi do të bashkohen. Profeti tha se “do të jetë dritë në mbrëmje” (Zak. 14:7).

Nëse ti dëshiron një jetë të Perëndisë, atëherë fillo me fjalën e Perëndisë.

Pranoje fjalën e Perëndisë në plotësinë e saj, çdo pjesë të saj! Dhe kur kjo të jetë plotësia e Perëndisë brenda teje, atëherë shiu që bie do të sjellë pikërisht atë që është mbjellë në kopshtin tënd. Vëreni këtë: fjala "moureh" do të thotë “mësim, shi i hershëm”. Quhet shiu “Moureh”, shiu i mësimit që erdhi (Ligji i Përtërirë 32:2).

Billy Graham e ka prekur botën, pentekostalët e kanë prekur botën, dhe fjala e Perëndisë e ka prekur botën. Çfarë po ndodh tani? Po pritet shiu i vonshëm.

Ky është momenti kur do të dalin frytet (Mateu 7:15-20). Oh, shpresoj që po e kuptoni.

Lloji i farës që ti ke mbjellë në arën tënde, do të jetë edhe lloji i korrjes që do të marrësh.

Nëse denominacionet (konfesionet religjioze, fetare) duan më shumë anëtarë, kjo është ajo që do të marrin. Këtë kanë marrë. Pentekostalët duan më shumë pentekostalë; këtë do të marrin. Kjo është e vërtetë. Por fjala do të sjellë bij dhe bija të Perëndisë. Edhe kjo po vjen. Prisni këtë shi të madh të vonshëm që do të vijë... Vetëm prisni edhe pak. Lloji i korrjes që do të merrni është i njëjtë me llojin e farës që keni mbjellë në arën tuaj.

Baptistët duan të tejkalojnë metodistët, metodistët duan të tejkalojnë luteranët, dhe luteranët duan të tejkalojnë katolikët. Të gjithë duan të tejkalojnë dikë.

Shihni, kjo është një Frymë e organizatës. Jezusi tha: "Por pak do të shpëtohen. E ngushtë është porta dhe i ngushtë është udhëtimi, dhe pak janë ata që e gjejnë" (Mateu 7:13-14). Vetëm pak! Kur Ai tha “pak”, kjo është fjala e Perëndisë, kjo është fara, atëherë vetëm pak do të jenë. Nuk do të jenë dhjetëra miliarda. Do të jenë vetëm pak që do ta gjejnë. Ata që janë të paracaktuar për këtë, ata do ta dëgjojnë. Shiu i hershëm ka ardhur tashmë.

Ne debatojmë aq shumë për "shiu e vonshem", kemi pasur lëvizje që quheshin "Shiu i vonshem", shiu i vonshem, shiu i hershëm, shi i brendshëm, shi i jashtëm... Kohët e fundit kam lexuar. A e dini se çfarë do të thotë "shiu i hershëm" në hebraisht? Shiu i hershëm, ai i pari, do të thotë "shi mësimi". Shiu i dytë është Fryma që vjen mbi atë që është mësuar dhe sjell korrjen. Si ndodhi që patëm një zgjim të tillë? Pentekostalet, baptistët, të gjitha pemët e tjera nxorën sythat e tyre, ashtu siç tha Jezusi. Dhe çfarë prodhuam ne? Baptistët thanë se në vitin 1944 fituan një milion anëtarë më shumë. Shikoni katolikët, sa janë rritur. Shikoni të gjitha denominacionet. Shikoni pentekostalët. Çfarë kemi bërë? Ne kemi mbjellë fara denominacionale dhe kemi korrur një të korre po ashtu denominacionale. Kisha duhej të ishte tani e zjarrtë për Perëndinë, nëse farë e Fjalës ishte mbjellë, dhe do të kishte shenja dhe mrekulli, dhe një kishë që do të ishte një zemër dhe një shpirt, që marshon drejt Sionit për Rrëmbimin. Kjo është e vërtetë. Çfarë kemi bërë? Ne kemi pasur ligjërata intelektuale në vend të Fjalës. Kemi pasur debate kundër Fjalës dhe çdo gjë tjetër të mundshme.

Moureh, moureh, shiu, shiu i hershëm, shiu i mbjelljes, ka dalë. Tani, çfarë ndodhi? Shiu i hershëm është mbjellë. Shiu i vonshem ra. Çfarë ndodhi? Sodoma dhe sodomitët e saj u dogjën. Abrahami mori djalën e premtuar.

Jezusi tha: "Lërinë të rriten bashkë. Kashta do të lidhet dhe do të digjet. Gruri do të mblidhet në hambar."

(Mateu 13:24–30). Shikoni, shiu i vonshem është përpara nesh.

Tani, çfarë përpiqen të bëjnë, përpiqen të prodhojnë një shi të vonshem. Marrëzi! Ky shi i vonshem do të përhapet mbi botë, vëlla. Dhe pastaj një shi i hershëm që mbjell Fjalën... Kjo është e vërtetë. Tani, do të shihni se çfarë do të sjellë shiu i vonshem. Do të kuptoni se duhet të jeni pjesë e tij. Pentekostalët dhe të gjitha grupet do të bashkohen dhe do t'u mbyllin dyert atyre që nuk do të dëgjojnë, dhe nuk do të lejohet as të hapësh gojën. Kjo është e vërtetë. Atëherë Ai do të vijë.

Kjo është kur Ai do të shfaqet. Atëherë do të shihet një shi. Oh, qëndro i qetë, mos u shqetëso, lëshoje!

Dikush më kërkoi që ta përsërisja fjalën hebraike. Në Joel 2:23, ku flitet për ardhjen e shiut të hershëm dhe të vonshëm, fjala për "i hershëm" në hebraisht është "Moureh", që do të thotë "mësimdhënie". Me fjalë të tjera, do të ketë një shi mësimor dhe një shi të korrjes. Tani, ne e kemi pasur shiun e mësimin, dhe tani jemi gati për shiun e korrjes. E dini, shiu i parë është kur mbillet fara. Kjo e bën farën të fillojë të rritet. Pastaj, pak para se të piqet, vjen një shi tjetër. Ky quhet shiu i korrjes. Ne e dimë, më parë vijnë shirat në pranverë, dhe më pas shirat rreth qershorit e bëjnë korrjen të piqet.

Tani, shiu, siç kemi zbuluar, ishte Frymë. Dhe tani, ne ndaluar aty ku unë po shprehja mendimet e mia rreth asaj se çfarë do të jetë e gjithë kjo. Unë besoj se shiu është sjellë tashmë. Kjo është arsyeja pse jemi bërë të qetë, sepse toka është mbjellë tashmë. Vështirë se gjen ndonjë vend ku nuk është mbjellë. Është përhapur nëpërmjet radios, televizionit, kasetave me zë, fjalës – përmes gjithçkaje – dhe ka mbjellë tokën. Fara është mbjellë. Tani, nuk mund të marrësh asgjë tjetër përveç farave që janë mbjellë. A e kuptoni tani? Do të jetë fara që është mbjellë. Tani, Fryma do të bjerë, por Ai do të sjellë një korrje nga ajo farë mbi të cilën ka rënë.

Mirë, unë parashikoj që dy grupimet fetare, grupi pentekostal dhe grupet ungjillore, do të bashkëpunojnë në një denominacion, do të bashkohen dhe të gjithë do të bëhen pjesë e një bashkimi kishtar (Këshilli Botëror i Kishave). Ata janë tashmë pjesë e tij – të gjithë. Dhe përmes tyre do të vijë një presion ose bojkot që do të ndalojë çdokënd që nuk i përket kësaj bashkësie kishash. Bibla flet për këtë, se do të ketë një bojkot, madje në një mënyrë të tillë që njerëzit nuk do të mund të blejnë ose shesin nëse nuk e kanë pranuar këtë – shenjën e bishës, që është romanizmi, dhe imazhi i bishës, që është protestantizmi (Zbulesa 13:4–13). Bisha kishte fuqi, autoritet, për t'i dhënë jetë imazhit që të flasë, dhe kjo ndodhi. Kjo është bashkimi i kishave, kur ato bashkohen.

Tani, ka shumë të rinj këtu. Nuk e di, Jezusi mund të vijë këtë pasdite, mund të vijë vitin tjetër. Nuk e di kur do të vijë. Por mbani mend, kur unë...

....në ditën e ardhjes së Tij, ndoshta nuk do ta përjetoj vetë, megjithëse shpresoj që ta përjetoj, dhe disi besoj se do ta përjetoj... Epo, nëse nuk e përjetoj, mos e lini kurrë këtë fjalë të largohet nga veshët dhe zemrat tuaja! Shihni, mendoni për këtë, unë po flas në emër të Zotit! Tani, unë besoj me gjithë zemër se do të zhvillohet kështu. Do të ketë një lloj bashkimi, një bojkot. Të gjitha vendet si ky këtu do të mbyllen. Dhe nuk do të mund të flitet, përveçse nëse merr leje ose autorizim nga ky bashkim i kishave, për të mbajtur një shërbesë.

Të gjitha shkrimet që ende nuk janë përmbushur, duhet të përmbushen para asaj kohe. Bibla duhet të përmbillet. Periudha e shpëtimit për johebrenjtë duhet të mbyllet me fundin e epokës, kur ky lajmëtar i vajosur të vijë. Natyrisht, ai do të mbjellë farën e tërë Biblës, nga gjarpri (Zanafilla 3:1-7) deri te lajmëtar i shiut të hershëm. Pastaj ai do të refuzohet nga njerëzit e besimeve, si paraardhësit e tij Gjon dhe Elia, ashtu siç ka thënë Zoti ynë. Ashtu si Elia në kohën e Ahabit, ashtu do të ndodhë edhe këtu në këtë vend, sepse ky vend është një pasqyrim i Izraelit.

Pastaj, në kohën e shiut të vonshëm, do të shfaqet një Mali Karmel, një vendim, një kulm, Bibla do të përmbushet deri në detaje. Gjon Pagëzori, lajmëtar i Tij përpara Tij, i përmendur tek Malakia k. 3, mbolli një shi të hershëm dhe u refuzua nga kishat, besimet religjioze, farisenjtë dhe saducenjtë e kohës së tij. Jezusi erdhi dhe pati një vendim në malin e shndërrimit. Ky pararendës i ditëve të fundit do të mbjellë për shiun e hershëm. Jezusi do të sjellë vendimin midis besimeve religjioz dhe Fjalës. Kur Ai të vijë, vendimi, rrëmbimi i Nuses së Tij... I pari ishte Mali Karmel (1 Mbretërve 18:30-40), i dyti ishte Mali i Shndërrimit (Mateu 17:1-8), i treti do të jetë Mali Sion.

Ne jemi në kohën e fundit. Faret janë mbjellë tashmë. Shiu i vonshëm është duke ardhur.

Mbani mend, shumë shpejt do të ketë një bashkim denominacional që do të jetë tmerrues. Dhe ata do të bashkohen në Bashkimin e Kishave (Këshilli Botëror i Kishave), dhe atëherë ky lloj kishe do të vihet jashtë funksioni (sipas dijenisë së tyre). Është në atë kohë që Jezusi do të shfaqet dhe do të tregojë se kush është Nusja dhe kush jo.

Ju keni folur shumë për shiun e vonshëm. Nuk dua t'ju diskreditoj si "vëllezër të shiut të vonshëm", por ky nuk është shiu i vonshëm. Po të kishte qenë shiu i vonshëm këtu, fuqia e Perëndisë do ta kishte goditur këtë gjë dhe do të ishte përhapur në gjithë botën. Shiu i vonshëm është duke ardhur. Çfarë po ndodh? Kisha po përpqet të prodhojë vetë diçka, ashtu siç u përpoq Eva. Ajo u përpoq të kishte më shumë dritë, të krijonte diçka (Zanafilla 3:1-5). Ne kemi bërë të njëjtën gjë, jemi përpjekur të krijojmë diçka vetë. Hiqni duart prej kësaj! Perendia është Ai që e bën. Merreni Fjalën e Tij dhe besojeni! Ruajeni në zemrat tuaja! Dhe kur të fillojë të bjerë shiu, jeta do të marrë jetë dhe Fjala do të shfaqet vetë në realitet.

Dhe kur bie Fryma, ajo bie si mbi të drejtët, ashtu edhe mbi të padrejtët (Mateu 5:45; Hebrenjve 6:4-8).

Mendoj se pas këtij zgjimi të madh që ka përfshirë botën në këto vitet e fundit, të shenjtët e Perëndisë duhet të ishin kudo në vende qiellore (Efesianëve 2:6), dhe fuqia e Perëndisë duhet të hynte në spitale dhe kudo tjetër dhe të ndodhnin shenja dhe mrekulli të mëdha. Por Ai nuk po arrin t'i bëjë njerëzit të qëndrojnë të qetë mjaftueshëm. Nëse mbjellim fara të denominimeve (ndarjeve kishtare), do të korrim një të korrë denominacionale. Kjo është krejt e saktë. Kjo është ajo që kemi bërë.

Çdo njeri është një shi i vonshëm për tjetrin. Shikoni, Luteri ishte një shi i vonshëm për katolikët. John Wesley ishte shi i vonshëm për Luterin. Pentekostalët ishin shi i vonshëm për denominacionet. Tani që edhe pentekostalët janë organizuar, çfarë do të ndodhë tani? Shikoni?

Te'k Joeli k. 2:28 Ai premtoi që në këto ditë të fundit do të derdhet një shi i vonshëm mbi popullin në ditët e fundit. Mendoj se fjala greke aty është "kenos", që do të thotë "Ai e zbraz vetveten", jo në kuptimin siç do të thonim ne që diçka brenda dikujt është derdhur jashtë, por Ai e zbraz vetveten. Ai ndryshoi formën e Tij – "En Morphe". Ai ndryshoi nga ajo që ishte, në atë që është tani. Ai kurrë nuk e ndryshon natyrën e Tij.

Por në Ditën e Rrëshajëve, Ai e ndryshoi veten nga Biri i Njeriut në Birin e Perëndisë. Ai nuk erdhi tek populli, por erdhi në popull, i njëjti Perëndi, për të vazhduar shërbesën e Tij në këtë epokë të madhe.

Ai ka profetizuar në Bibël se do të vijë një ditë që nuk do të jetë as ditë dhe as natë, por në mbrëmje do të ketë dritë. Tani, dielli, në kuptimin gjeografik, lind në lindje dhe perëndon në perëndim. Është i njëjti diell gjatë gjithë kohës.

Tani, kur Biri e shfaq Vetveten në manifestimin e Fjalës së premtuar për Izraelin, popullin e Lindjes... Ne kemi pasur një ditë errësire. Kemi pasur mjaft dritë në kohën e reformatoreve për të ndërtuar kisha dhe denominacione, për t'iu bashkuar atyre, për të hyrë brenda, për të puthur foshnjat, për të martuar të rriturit dhe për të varrosur të vdekurit dhe kështu me radhë, dhe për të jetuar në kishë. “Por në mbrëmje do të jetë dritë,” tha Ai, “në mbrëmje.” (Zakaria 14:7). Dhe asnjë Shkrim nuk mund të prishet. Dhe i njëjti Bir, i cili e zbraz Vetveten (kenos) në ditën e Rrëshajëve, premtoi ta bëjë të njëjtën gjë në mbrëmje. Ja, është sipas premtimit.

Mblidhni shenjat së bashku. Shikoni çfarë po ndodh dhe shikoni çfarë ka premtuar Ai, atëherë do të shihni ku ndodhemi. Mblidhni gjithçka së bashku. Ju mund ta shihni zbulesën e këtij të Madhit dhe të Fuqishmit. Traditat sërish i kanë verbuar njerëzit ndaj këtyre gjërave të mëdha që janë profetizuar.

Dhe cila ishte shenja e fundit që patën Abrahami dhe Sara para se të vinte Biri i premtuar, për të cilin kishin pritur gjatë gjithë këtyre viteve? Ishte Perëndia që qëndroi atje në formën e një njeriu dhe që i dalloi mendimet në zemrën e Sarës. Sara përfaqëson kishën. Ai dalloi mendimet që ishin në kishë, edhe pse ajo ishte pas Tij (Zanafilla 18:1-15). A është e vërtetë kjo?

Ai (Elohim) tha: “Unë do të të vizitoj (Unë, përremri vetjak), Unë do të të vizitoj sipas kohës së jetës, dhe ti do të lindësh atë fëmijë për të cilin keni pritur” (Zanafilla 18:9-10). Dhe menjëherë pas kësaj, ajo u shndërrua në një grua të re dhe ai në një burrë të ri, dhe Isaku u soll në skenë – Biri i premtuar (Zanafilla 21:1-8).

Shiu i vonshëm është gati të bjerë. “Ju e keni mbajtur këtë farë brenda për mjaft kohë tashmë, keni besuar dhe keni pritur një Bir që do të vijë – dhe ai po vjen.” Amen. Kjo është kisha e vërtetë sot, ai farë e zgjedhur. “Ju keni pritur për Të, dhe Unë do t’jua dërgoj.” Amen. Çfarë tha kjo? Fjala. Unë besoj se ju e shihni gjënë e fundit.

...që do të ndodhë për kishën para Rrëmbimit. Pikërisht kjo është. Unë e besoj këtë. Shiu ka kaluar. Lexoni tri kapitujt e parë të Zbulesës dhe do të shihni çfarë i është premtuar kishës. Kjo është ajo që i është premtuar kishës, pikërisht atje – epokat e kishës. [11]

Pra, kjo është edhe arsyeja pse shiu që bie mbi bimësinë natyrore të tokës është një hijeshi e shiut Frymeror, që jep jetë të përjetshme dhe bie mbi kishën. Sepse ne e quajmë atë shiu i hershëm dhe shiu i vonshëm. Dhe është një shi, një derdhje e Frymes së Perëndisë mbi kishën e Tij (Zak. 10:1). [12] Oh, do të ketë një shi të vërtetë të hershëm dhe të vonshëm në ditët e fundit mbi atë grup të vogël, që vjen me Të mbi atë gomar të vogël, thjesht dhe përlësisht, pa dyshim dhe pa ndarje denominacionesh, dhe që thërret: “Hosana Mbretit që vjen në emër të Zotit!” (Gjoni 12:13). [13]

Fjala e premtonte këtë. “Do të ndodhë përpara se të vijë dita e madhe dhe e tmerrshme e Zotit: ja, unë do t’ju dërgoj Elian, profetin. Ai do të kthejë zemrat e bijve të etërit të tyre.” (Mal. 3:23-24)

“Dhe do të ndodhë në ditët e fundit që Unë do të derdh Frymën Time nga lart. Shiu i hershëm dhe shiu i vonshëm do të vijnë bashkë në ditët e fundit.” (Psalmi 72:6)

Të gjitha këto premtime nëpër Shkrime janë dhënë. Ne shikojmë lart dhe i kushtojmë vëmendje nuses së vërtetë mbi tokë në këtë orë dhe shikojmë nga lart.

Kishë, Ai do të vijë një nga këto ditë. Po aq i sigurt sa erdhi herën e parë, Ai do të vijë përsëri. Përgatitni gjithçka! Ndahuni nga byku, shtrihuni përballë diellit! Vazhdoni të shikoni lart! Jini në pritje! (Osea 6:3)

Vëllezër, le të përgatitemi për gjithçka, sepse një nga këto ditë zjarri do të bjerë. Ne do të ngjitemi lart. Tani, le të përgatitemi për kohën kur zjarri do të bjerë.

Ne jemi në ditët e fundit. Të gjithë e dimë këtë. Dhe ne jemi të gatshëm për ardhjen e Zotit. Ajo që duhet të bëjmë është të ndahemi nga çdo mëkat. Ndahuni nga gjithçka që i përket botës! Mos e doni botën as gjërat e botës! (1 Gjonit 2:15-16). Mos lejoni që dikush t’ju mashtrojë me doktrinën e tij! Qëndroni pikërisht në premtimin e Perëndisë, në fjalën e Perëndisë; dhe kjo fjalë, nëse është fjala për këtë ditë, Perëndia do ta vërtetojë atë. Nëse nuk e bën, nuk është fjala për këtë ditë. Fjala që ra në ditën e Pendkoston nuk do të funksionojë sot. Jo, ajo ishte për Pendkoston. Kjo është për nusen: për kthimin në shtëpi të nuses.

Ne kemi diçka tjetër. Pentakostalët e kanë përfaqësuar përsëri këtë. Por ne jemi në Epokën e Nuses. Ashtu si fjala e Noes nuk do të kishte vepruar në ditët e Moisiut, po ashtu edhe ligji i Moisiut nuk do të kishte vepruar në kohën e Palit.

Kishë, ju, të cilëve ju flas sot përmbi komb, nëse jeni ndarë nga denominacionet dhe gjithë papastërtitë dhe gjërat e kësaj bote, dhe nga të gjitha ato gjëra që ju mbajnë në mësimet e krijuara nga njerëzit, rregulla dhe të tilla gjëra – nëse jeni ndarë prej tyre, atëherë shikoni lart! Bëhuni gati! Zjarri do të bjerë një ditë prej ditësh. Perëndia do ta lejojë Atë të vijë, që të mund ta shikoni. A do të jesh gati kur Ai të vijë? A do të jesh gati të ngjitesh me Të kur Ai të vijë? Rrëmbimi misterioz i Nuses mbinatyrshe... Ajo do të shndërrohet nga e vdekshme në të pavdekshme, në një çast, në një të rrahur të syrit (1 Kor. 15:51-54). Ne që jetojmë dhe kemi mbetur nuk do t'i paraprijmë atyre që kanë fjetur (1 Sel. 4:13-17).

Tani, ne e dimë se kjo është dita e shpëtimit, kur Perëndia po thërret njerëzit nga bota, nga një jetë mëkati në një jetë shërbimi. Dhe në atë ditë, kur Perëndia e ka derdhur Frymen e Tij nga lart, shenja dhe mrekulli të mëdha do ta shoqërojnë shërbesën e kësaj dite. Kjo është kur shiu i hershëm dhe i vonshëm bien bashkë. Dhe ne e dimë që do të ketë shenja dhe mrekulli të mëdha, gjë që refuzohet nga shumë denominacione të mëdha. Por unë jam shumë mirënjohës për këto dyer të hapura në të cilat kam pasur mundësinë të hyj, dhe frymëzimi po i jepet të rinjve, si p.sh. pastorit tuaj këtu... Kur unë po filloj të plakem dhe e di që ditët e mia janë të numëruara, tani e di që këta të rinj mund ta marrin këtë mesazh dhe ta çojnë përpara deri në ardhjen e Zotit, nëse Ai nuk vjen në brezin tim... Edhe pse shpresoj ta shoh Atë, çdo ditë e pres dhe rri zgjuar, duke u përgatitur vetë për atë orë.